



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

Tir Yimym

tiryimym@aolima

tir yimym

TAPAK 7

Taiwan-i US dang F-16 fighters tekaratiba nung agütsütsü mepeshi

UP election atema nüboyimer tongtiji Priyanka Gandhi asütsü



VOL. XIX NO. 10 (ADOK 10) DIMAPUR TENTONÜ (MONDAY) MONGPUTENI (OCTOBER) 18, 2021

₹ 5.00

COVID Nagaland: 40 dak putet & 28 taneptsü angu

Kohima, October 17, 2021 (TYO): Nagaland nung Deobarnü nisung 40 dak COVID-19 aliba putet aser parnok züngsema nisung 31,611 kümogo.

"Tesüiba ghonda 24 tsüngda nisung 40 dak COVID-19 putet. Parnokji Tuensang nung 24, Longleng nung 6, Kohima nung 5, Dimapur nung 3 aser Phek o Wokha nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang nisung 28 tashi taneptsü angu. Parnokji Kohima nung 14, Tuensang nung 6, Dimapur nung 5, Phek nung 2 aser Mokochung nung 1 lir" ta paisa ashi.

Nisung 31,611 rongnungi 29,667 taneptsü nguogo aser ibaji 93.85% lir, ta paisa ashi.

Tang nisung 248 anepdaludar saka parnok 176 dakbo shirangba yimya kecha mali, ta Dr Kikon-isa metetdaksü.

"Hokolbar tashi nung nisung 700,612 nem COVID-19 vaccine indang dose 11,34,053 agütsüogo" ta State Immunization Officer, Dr Ritu Thurr-ia metetdaksü.

Vaccine agirtemji frontline workers 60,945, healthcare workers 15,998, arishi küm 45 ser temapur 200,503 aser arishi küm 18 nungi 44 tsügda alir 423,166 lir, ta paisa ashi.

"Vaccine agirtem rongnung nisung 433,441-i dose anaprong agiogo. Parnokji frontline workers 47,701, healthcare workers 13,327, arishi küm 45 ser temapur 150,099 aser arishi küm 18 aser 44 tsüngda alir 222,314 lir" ta Dr Thurr-isa metetdaksü.

ENLU-i sarasadem sentong ayonger

Dimapur, October 17, 2021 (TYO): Eastern Nagaland Legislators Union (ENLU)-i October 20, 2021 anepdang sarasadem sentong ka agütsü ayongzüker.

Tsüngrem dang Eastern lennirtem aser ketdangsurtem nem temoatsü meshia sarasadem sentong ayongzüker. ENLU ketdangpurtem aser

Kohima nung Eastern Nagaland Arogotem nungi Pastor temi Eastern Nagaland kübok arogo mungdang balala nung Executive Secretary tem dangi shidi ka nung October 20 anepdang 5:00 ako nungi 7:00 ako tashi "Together on our Knees" omen nung ajemdaker sarasadem sentong alitsü mepishia metetdaksüogo.

NE nung Oct 21 tashi tzünglu arutsü

New Delhi, October 17, 2021 (Agencies): October 21, 2021 tashi India nung tzünglu kanga arutsü ta India Meteorological Department (IMD)-i Deobarnü metetdaksüogo.

October 19 tashi northwest India len tzünglu kanga arutsü ta IMD-i ashi.

Bay of Bengal nungi mopung aonba ajanga Northeast India

nunga tzünglu arutsü. October 18 nungi 20 tashi Nagaland, Manipur, Mizoram aser Tripura nung tzünglu kanga arutsü. October 18 nungi 21 tashi Arunachal Pradesh, Assam aser Meghalaya tzünglu arutsü aser October 19 aser 20 anogotem Arunachal Pradesh, Assam o Meghalaya nung tzünglu terara arutsü, ta IMD-isa metetdaksüogo.

Tanur nem COVID vaccine agütsütsü atema Centre-i lemteptsü

New Delhi, October 17, 2021 (Agencies): Centre sorkari tanurtem nem coronavirus anema vaccine agütsütsü atema tatembang telemtetba agütsü, ta COVID-19 Task Force mendenbuba V K Paul-i Deobarnü ashi.

"COVID-19 menatepba ajema akümer aser wara tanabuba süia aoer saka asenoki tensa tajungba kümogo ta mebilemstüla, kechiyong linük aika nung Covid wara anaben dang nungi teimba ajuruogo" ta V K Paul-i metetdaksü.

"Linük aika nung arishi küm 18 ser teküpokpur nem vaccine agütsü tenzükogo saka onoki kanga junga shisadangba aser child licenced vaccines tensa

reprangdangba sülen ang telemtetba agütsü" ta paisa ashi.

"Tanurtemia COVID menateper aser parnok aika dak putetogo. Ajisiüaka, kasa mapang nung tanurtem dak COVID putetyonga parnok balaka mekangshir mesüra aika dak shirangba yimya malir" ta Paul-isa ashi.

"Tanurtem atema vaccine peria yanglutetra parnok kümzüka ayutsü atema kechiba mamshitsü?" ta paisa asüngdang.

"India nung tang benjung mongpu ajurua lir aser nisung lokti adenshir anungji iba ama tensa ka nung virus menatepa aotsü ana nung dang lir" ta Paul-isa ashi.

Naga Hoho nung Nagaland nungi Naga kin ka danga maden

Dimapur, October 17, 2021 (TYO): Naga Hoho nung Nagaland nungi Naga kin ka danga dena mali anungji parnoki telemtetba agiba nung Nagaland nung aliba Naga nung maden, ta 14 Tribal Hohos of Nagaland-i metetdaksüogo.

"Naga Hoho nung Nagaland nungi Naga kin ka danga mali aser Nagaland nungi Naga nungertem atema Nagaland Kin Hohotemi dang telemtetba agütsü" ta Convener K.T Vilie aser Secretary Laji Luyanba nati Deobarnü sangdong ka nung metetdaksü.

October 16, 2021 nü 14 Tribal Hohos of Nagaland rongdak senden ka ayonga

amendang taoba mapang Naga yimten latettsü dak sendakba nung telemtetba balala agia alibatem ama dang asütsü bangzüngtepa liasü.

"India sorkar atema teshimtet nübo A.K Mishra-i yimjung maparen tejakleni aotsü aser telemtetba ka agütsü atema temolung agüja inyakba ngua tenüngsang agütsür" ta parnoki metetdaksü.

Nagaland nung Kin Hohotemi Naga yimten olemtep nung adener ajak dang mapang meindoki tenangzüktep ka nung sign asütsü ayongzüker, ta 14 Tribal Hohos of Nagaland-isa ashi.

"Telok kari danga Kin Hoho lennirtem aser tanga Naga Civil Society lennirtem amokmerena mesüra tashiyim amshia merenshira, kin ajaki iba inyakyim anema noktaksü" ta parnokia metetdaksü.

"Naga nung aginüba ama tekaratiba nung telemtetba ka agütsü atema Kin Hohotemi mpa inyaksü. Yimten olemtep nung shilem agirtemi telemtetba magidang Nagaland asoshi tenangzüktep agiba onük ajak Kin Hohotem dang tamasa metetdaksütsü mepishir" ta Convener K.T Vilie aser Secretary Laji Luyanba nati sangdong nung ashi.

Vellore nung NBCC meyong ali kimong ka lir

Dimapur, Oct. 17 (TYO) : Küm metsü jakdang Christian Medical College & Hospital, Vellore nung Nagatsür rongnung mezüng ordain asüla Tsüngrem tenzüker, Rev. Noksangla, la Chaplain inyakba mapang, Naga nung CMCH Vellore nung taneptsü bushia arurtem asoshi ki ka akatsübaji kanga nungdak ta bilema, lai temulungertem nungi tenla bendena ali tilaka alia yuja lir.

Iba kimong ya tasazük nung 30 ft x 60 ft lir aser küm metsü jakdang iba liji sen lakh 4.50 agi ali ta angazüker. Iba kimong ya lai aneplalua Nagaland Baptist Church Council (NBCC) tenüng nung ali aser ali alir zülutepba kaket ajak nung NBCC kibur ser inyaktepa lir. Ajisiüaka, iba sülen kimong nungji ki yanglua inyaksü atema shingai temulung magütsü aser aneplalua masü aruba agi, tangbo ali kimong indang tezülutepba kaketjia shiba ket nung aliar

mejangjai kümogo ta angazüker.

Taoba küm pungo trok ka jakdangang, asenok tia junga CMCH purtemiang Vellore nung NBCC ali tilaka lir ta bushiteta kaket kar agütsüba nungi teyari agia tangang CMC Vellore nung Naga Chaplain, Lipoktemshi-i NBCC den osang agitepa nungdakba kakettep bushitepdagi ta angazüker. "Iba ali kimong indang kakettep bushitepdang, 2018 küm nungi tenzüka Tamil Nadu nung Additional PCCF Wb.Lima IFS aser TNHB nung MD Wb.Angam Chiru IAS nati yariba ajanga ali indang kaket karbo ngutetogo," ta iba osangbeneri Chaplain Lipok den jembidang pai metetdaksü.

Joko, küm talangka kibur mali ama toktsüba agi, alibo bushitetogo saka iba kimong jagi aotsü lenmang mali kümogo, anungji aji kidanger dang yoker tanga tesem tajungba ka nung sen bushisemer ali-kimong

tesadamba ka aliang tajungba asütsü ta paisa ashi.

Iba ali kimong indang kaket mengui aliba ajak bushitetsü atema ano maneni teyaritepertemi yaridagi aser NBCC nungia osang agitepdagi ta paisa ashi.

Rev.Dr.Noksangchila ya Yaongyimsentsür lir aser tang la Chumukedima nung lir. Lai Chumukedima nung aliba la meyong kimonga Tsüngrem mapa atema ABAM nem tenla agütsüogo.

"Vellore nung lai Naga nungertem anisüngzüksü atema NBCC tenüng nung ali kimong alia yutsübaji mesendoki, yaktasa Naga limai Yisu yimsü tajung arur küm 150 ajungba benjong, Sesquicentennial 2022 küm mamongdangsa bushitepa aneplaludaktsüner," ta lokti ajungtsü atema khuretsa bilema inyaksür Wb.Bendang Imsongi NBCC nem temepishiba shiti ka taoba hapta nung agütsüogo.

Mkg DCC-i Dr. S.C Jamir tasoba anogo nungtem mapa tajung kar inyak

Mokokchung, 17 Oct (TYO): Tsürabur aser Naga nung lenir taoba Nagaland Chief Minister aser taoba Goa, Gujarat, Maharashtra aser Odisha Governor Dr. S.C Jamir arishi küm 90 ajungba nungtem District Congress Committee Mokokchung (DCCM)-i pa asoba anogo Oct 17, 2021 nü parnok party office nung sentong tajung ka ayongzüka mungogo aser Orphanage, district jail, Covid-19 Hospital aser Covid-19 Care Centre-tem semdanga chiyungtsü kar ajanga lemsatep.

Iba sentong nung taoba MLA aser tang NPCC Vice President - Supongmeren, NPCC Vice

President - Alemjongshi, NPCC Legal Advisor - Maongkaba, NPCC Secretary - Sashimar, DCCM President - Watimongba, MDCC President - Chubala, MDCC Vice President - Rongsenla parnoki shilem balala agia tepela o den tayongzüka o tulu bener arua tesentepertem ayongzüker. DCCM General Secretary (Admin) - P. Aley-i Dr. S.C Jamir indang taküm otsü tatsüka metetdaksü.

Sentong nung NPCC ketdangsurtemi anir DCC ketdangpurtem, DCCM advisor-tem, Mahila, DYC, ACCC, Seval Dal, Arkong Ward yimden aser temulungertem arua aden. Taoba MTBA pastor Rev. Luin ajanga

lenir Dr. S.C Jamir asoshi temoatsü meshia sarasademtsü.

Jangratemtsü kaji; Dr. S.C jamir tasoba anogo tenüng nung Congress teloki Sabangya nung Care & Support Society-i aneplaluba Orphanage, Mokokchung District Jail nung puoka alirtem, Covid-19 Hospital nung shiranga amungertem, Covid Care Centre (CCC) nung amungertem semdanga chiyungtsü tapu balala ajanga lemsatep. Iba den Dr. S.C Jamir ya Mokokchung town kübok Arkong Ward nungi asünung, Arkong Ward nung tambusang aser tantsütila nem senpet sen terara senpettsü.

(Maneni tapak 2 nung...)

Moayimti nung teintet rogotemi Minister Temjen Imna Along dang pelar



Dimapur, Mongputeni/Oct. 17 (TYO): Moayimti yimtsü nung lanur aturartem aki-alui aser mapa balalai oseper yimdaq tantsür-tamburtem aser leni moteter kidangmunger sentepa lima yimtsü aser lanu-asensor asoshi temoatsü meshia sarasademdak aser sadoksanema pei-pe shisa tangatetba yari ajungshitepa amungdak "Old-Age Prayer

Home" ka nungdak ta ajiteta, Minister, Higher Education & Tribal Affairs, Govt. Of Nagaland, Temjen Imna Along Longkumer-i rongsen jenti indoka yim tiyong nung nungdak ajak abensa aliba ki ka yanglutsür September 27, 2021 nü meshiteta lapoker yimtsü nung tantsür-tamburtem nem agütsüba atema ozü Moayimti

süngkumshi nungi tantsür-tambur ajungai Minister Temjen Imna Along dang pelar, ta sangdong ka ajanga ashi.

Teyanglur takoksang Tsüngremi yimsüsür nem sasü-anema arishi talang den pa wadang Tsüngrem sentsüwangshi asoshi tarutsü anogotem azükarua moajangma ta sarasademtsür, ta sangdong ajangasa ashi.

All India Sainik Schools Entrance Exam atema metetdaksür

Dimapur, Mongputeni/Oct. 17 (TYO): Tetsür aser teburtem class VI aser tebur class IX atema All India Sainik Schools Entrance Exam 2022 - 23 ya January 9, 2022 nung agitsü. Iba atema Online Registration ya September 27, 2021 nü tenzükogo aser October 26, 2021 nü shibangtsü, ta sangdong ka ajanga ashi.

Iba Online Registration

indang link ji <https://aissee.nta.nic.in> aser <https://www.sainikschoolpunglwa.nic.in> alitsü.

Class IV atema tanur ya March 31, 2022 tashinung arishi küm 10 nungi 12 tsüngta (April 1, 2010 nungi March 31, 2012 tsüngta asor) asütsüla.

Class IX atema tanur ya March 31, 2022 tashinung arishi küm 13 nungi 15 tsüngta

(April 1, 2007 nungi March 31, 2009 tsüngta asor) asütsüla, ta ashi.

Nagaland nung iba tatidang agütsütsü atema Examination Centre ya Class IV pur atema Dimapur, Kohima, Mon, Tuensang & Sainik School Punglwa nung alitsü aser Class IX pur atema Tuensang aser Sainik School Punglwa alitsü, ta sangdong ajangasa ashi.

Mkg DCC-i Dr. S.C Jamir tasoba anogo nungtem...

(TAPAK 1 NUNGI...)



Dr. S.C Jamir arishi küm 90 ajungba tenü nung pa tasoba anogo 17th Oct nü Mokokchung DCC-i party office nung sentong tajung ka ayongzüka amungdang tangokba noksa nung angur. Mokokchung, 17th October, 2021

Ungma nung Dr. S.C Jamir ya asür Senayangba Jamir aser asür Takatula na jabaso lir. Pa 17th October, 1931 nung Ungma yimdaq aso. Pa Mokokchung, Kolkata, Allahabad nung zünga B.A, LLB renem. 1958 küm Imkonglemla den kibong aküm. 2017 küm University of Cambodia-i pa nem Honorary Doctorate agütsü, nübur tenzükba mapa nung pa nem 2002 küm GoI-i konang tulu aketba 'Padma Bhusan Award' agütsü.

GoI o Naga nung tsüngda tenanzüktep yangluba koba dang "16th Point Agreement" ta ajar, iba otsüsütsü aket nungji

Dr. SC Jamir ya meyongnem agir rongnung ka lir. Member of Parliament ka ama 1961-1970 tashi inyak aser iba mapang Union Deputy Minister of Railways, Labour & Rehabilitation, Union Deputy Minister of community development & cooperation, Food & Agriculture mapa inyak. Iba den Prime Minister Jawarharlal Nehru indang parliamentary secretary inyak. 1962 küm GoI tenü nung UN delegation züngsem ka ama shilem agi.

Iba sülen Nagaland chief minister pungben tashi inyak

(1980, 1982-86, 1989-90 & 1993-2003). Pa ya Rajya Sabha nunga Nagaland state nungi 1987 nung ao saka 1989 nung iba mapa toktsü. State politic toktsür 2004-2008 Goa governor inyak, aji sür 8th July, 2008 nung Maharashtra governor shim aser iba mapang July 2009 nung Gujarat governor dena repa aben, aser 9th March, 2013 nü Odhisa Governor shim. Joko tain akümerji pa akhi ama politic nung yakyakabo meinyaker saka pa ya congress party asoshi state aser national level nung nüktang tajung ka lir.

Dimapur nung mejangjaba nisung tasü mang ka nguteta lir

Dimapur, Mongputeni/Oct. 17 (TYO): Mejangjaba nisung (non-local, tebur arishi küm 45-50 shi asütsü) tasü mang ka October 16, 2021 nü flyover Rail-gate Dimapur nung nguteta lir. Iba nisungba ya yaseta asüba südi, ta temolung melemi lir.

Ozüng agi melaba maparen ajak inyakba sülen tasü mang ya

post-mortem examination atema Dimapur Civil Hospital-i belener ogo.

Iba nisung indang kibur/kinunger/tembartemi Officer-in-Charge, East Police Station, Dimapur den mobile number 7085055020 ajanga

tongteprateptsü akok, ta sangdong ka ajanga ashi.

Mizoram nung AR temi sen lakh 37.20 jenjang heroin ngutet



Aizawl, Mongputeni/Oct. 17 (Agencies): Ozüng alema temesepba mozü shibelenba anema nokdakba nung ano takok tajung ka nguteta, Mizoram nung aliba Assam Rifles temi Champhai district kübok Zotlang-Khankawn Road nung heroin talep ka nguteta liasü.

Iba operation ya HQ Inspector General Assam Rifles (East) kübok HQ 23 Sector Assam Rifles indang Serchhip Battalion ajanga agia liasü.

Hokulbarnü iba operation ya Assam Rifles temi agiba mapang heroin No. 4 aliba sapon cases 7 nguteta liasü.

Parnoki ngutetba heroin ya sen 37,20,000 shi jenjang alitsü, ta asadangteta liasü.

Osang tejangja kar angazükba nung ajemdaker HQ Inspector General Assam Rifles

(East) kübok Serchhip Battalion of HQ 23 Sector Assam Rifles indang 8 Assam Rifles aser 2 Assam Rifles lungjemer iba operation ya agia liasü.

HQ IGAR (East) ajanga sangdong ka nung ashiba agi, Champhai indang Customs department ajanga temesepba mozü ya ayu aser iba dak sendakba nung nisung ka pua Champhai district kübok Champhai police station nem agütsüogo.

"Mizoram aser talisa India-Myanmar arütsü nung heroin No 4 ya kanga bulua shibeneler aser ibai tebilemtsü tulu lir," ta sangdong ajanga ashi.

Sentinels of Northeast ta nungja agüja aliba Assam Rifles temi maneni Mizoram nung ozüng alema shibelenba azüoktsü meranga inyaker, ta sangdong ajangasa ashi.

Manipur: Tangola junga mesashiteti mozüki nung tanur 100 dak tema lir

Imphal, Mongputeni/Oct. 17 (Agencies): Manipur kübok Churachandpur district nung tanurtem temang metaa aser tangola junga mesashitetba timtem aika dak ajurua lir.

Tesüiba anogo ishika tsüngta anogoshi tanur 10 shi district hospital-i anir aru.

Tang tashinung tanur 100 mozü kidangi anur aru aser item rongnung 60 pei kidangi meyipa yokogo, ta osang ajanga ashi.

Ita ana kinü tanur ka aser küm ana tanur ka dak COVID-19 tashidak puteta liasü.

Meyi nungi mongpui melenba ajanga tanurtem ya shiranger alitsü südi, ta mongintemi ashir.

Osang ajanga ashiba agi,

district hospital nungya yipten 33 dang lir aser tang yangji tanur 40 anepaluba mapang lir. Shiranger ya tesadang ka oxygen inoker lir, ta ashir.

Yipten peria maliba ajanga oxygen nungdaka aliba shiranger tanur tenet mozüki indang corridor nung anepalutar, ta osang ajanga ashi.

Tanur ka dak influenza, virus subtype H3N2 aliba jangjatet, ta ketdangtsür osang ka ajanga ashi.

Tanur 40 dak influenza tendangba nungi tanur 35 indang sample nung iba tashidak meliasü aser sample pezü junga mejangjateti lir.

Shirangertem ya kinü nungi arishi küm asem tashi lir, ta osang ajanga ashir.

CHÜMOUKEDIMA AO BAPTIST AROGO CHÜMOUKEDIMA TOWN SANGDONG

Chümoukedima Ao Baptist Arogo nung toklang tenzükba wadang nung Associate Pastor (Youth) ka aser Arogo Secretary ka atema tatidang agia liasü aser iba tatidang nung takok tajungtiba angur tenüng shimba sangdonger.

MAPA TENÜNG	TAKOKER TENÜNG	YIM TENÜNG
Associate Pastor (Youth)	Limatemsü Ao	Longjang
Arogo Secretary	Imlisunep	Mongsenyimti

Takoker nisung ana jagi Pastor CABA # 936616930 den tongtepratep asütsü mepishir. - Pastor.

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga tanepsü mangu. Ajsüaka, tang Kabiraj H. Umar Chesam contact no. 8416087414 / 6909717178 National awarded H. Umar Chesam Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüngda ni tanepsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM Yours sincerely - Atula Jamir, Add: Mokokchung



NF Railway-i Assam nung train service 3 tenzüksütsü

Guwahati, October 17, 2021 2021 nungi tenzükba New Bongaigaon nungi senzütsü. Iba train anepdang 7:30 New Jalpaiguri nungi ayamesotsü aser nikongdang 3:30 meta New Bongaigaon atongtsü. Iba train tanaben meyipa aotsü atema tasüngnü anepdang 7:05 meta New Bongaigaon nungi ayamesotsü aser nikongdang 4:15 meta New Jalpaiguri atongtsü.

Northeast Frontier Railway (NFR)-i Rangiya-Dekargaon tsüngda passenger special train ka aser New Jalpaiguri-New Bongaigaon station tsüngda express special train indang service tenzüksütsü lemtet. Train service ana den külemi, Dekargaon aser Bhalukpong station tsüngda passenger special train service ka tenzüksütsü asoshi NRF-i lemtetogo.

Tetsüngda tatsütsü senzüsembongertem ajangzükdaksütsü atema item train asempronlga October 20, 2021 nungi tenzükba senzütsü, ta NF Railway indang chief public relations officer, Guneet Kaur-i ashi.

Train No. 05821/05822 Rangiya-Dekargaon-Rangiya daily passenger special train ya October 20, 2021 anepdang 6:20 meta Rangiya nungi apusotsü aser 10:45 am nung Dekargaon atongtsü; aser nikongdang 4-45 meta Dekargaon nungi ayamesotsü aser aonung 9:40 meta Rangiya atongtsü.

Train No. 05703/05704 New Jalpaiguri-New Bongaigaon-New Jalpaiguri daily express special train ya October 20, 2021 nü New Jalpaiguri nungi ayamesotsü aser October 21, asoshi mepishir.

Item train senzüba aser anenba mapang tejangjatem IRCTC website nung agüja lir. Ano kasa osang ya osangkaket aser NF Railway indang social media sabang nung angutsü. Maneni, NF Railway tekolakpurtemi senzüsembongba mapang Covid19 dak sendakba tekümdangtsü meratem aser tetuyuba nung teti anidaksü asoshi mepishir.



Deobarnep Assam kübok Dhubri district nung National Bajrang Dal lennir ka kidang ozüngi memelaba mozü aika apu. Osang tejangja ka angazükba nung ajemdaker Dhubri Special Branch nung Deputy Superintendent of Police Dipankar Dutta Lahkar-i anir police telok kati Rahul Prasad'er ki mita aodang mozütemji apu. Iba mapang police-i nisung asem apu aser parnokji Rakesh Das (24), Rahul Prasad (26), Abu Taleb Mollah (33) nung ta jangjaogo. (Dhubri, October 17)

Itanagar DC Talo Potom-i sorkar school tem mita ao



Itanagar, October 17, 2021 (Agencies): Itanagar Capital Region Deputy Commissioner Talo Potom-i capital region nung ajungbena sorkar school tem mita ao. School ketdangsür nem jelia osang magütsü dang DC Talo Potom-i school tem semdanga senzü. Anogoshia school ketdangsüba aser midday meal scheme mapa inyakba metettsü atema pai sorkar school tem sema senzü.

DC Potom-isa class agi aser kaketshirtem dang subject balala aser General knowledge indang tasüngdangbatem asüngdang. DC Potom-i Polo Colony nung government higher secondary school semdangdang school ketdangsürtemi timtem ajuruba kar lemsatöp aser ibaji pai tempur dangi abentsü ta ashi.

Namsai nung deputy commissioner tem mungdang alidang tetuyuba aika agütsü. Tetuyubatem rongnung shisaliok renlokdaksütsü aser kaketshirtem, tesayurtem aser nübortem ajangzükdaksütsü indang liasü, ta Potom-i ashi. Capital region nung aliba school ajak nungi Rs 100 crores jungnüa teinyaktsütem lemsatöpogo, ta paisa metetdaksü. Pa indang office ket nung Rs

25 lakhs shi ka dang lir aser ibaji DDSE nem school tem nung tang rongdak nüngdakba mapatem inyaktsü agütsüogo ta Totom-isa ashi. DC Potom-i GHSS indang classroom aser campus tem reprangdang aser school kaketshirtem den ajurutepa sensaksem. Paisa state sorkar aser shisashirtem dang ita shia khen class ka sayutsü atema ayongzük. "Tanur aikati ozüngi memelaba mozü achir aser parnok dang lenmang shitak sayutsüla aser ajungmesotsü nüngdaker" ta DC Talo Potom-isa ashi.

Manipur nung vaccine agirtemi TV angutsü akok

Imphal, October 17, 2021 (Agencies): Manipur Sorkari October 24, October 31 aser November 7, 2021 nü Imphal West district nung special vaccination drive ka agitsü sangdongogo. Agüja aliba anogo asem vaccination drive ya centre asem nung lemsar agitsü sentong lir. Item tesemji GM Mall, Pologround aser Thangal Bazar Dharamshala vaccination centre asütsü. "Item centre asem nung shirnoki vaccine agidir, parnok bumper draw nung shilem agitsü aser sempet balala agizüktsü asoshi maongka angutsü" ta Imphal West district indang deputy commissioner, Kiran Kumar-i ashi.

Mezüng sempetji television set tuluka, tanabuba sempetji mobile phone, tasembubaji sü tabenba (blanket) aser consolation prize 10 alitsü, ta paisa ashi. Iba mega vaccination cum bumper draw sentong indang yimiyimji - "Get a shot, win a prize" asütsü. Arishi küm 18 nungi tenzükter tempur, shirnok mezüng mesüra tanabuba Covid-19 vaccine dose agitsü temsüa lir, parnok iba vaccination drive nung aruagi shilem agitettsü. Iba vaccination drive mapang lucky draw nung takok angur tenüngtem Imphal West district kübok GM Hall, Polo ground aser Dharmasala nung lemtettsü.



Assam Rifles indang Khonsa Battalion-i October 16, 21 nü Longding district kübok Kunsu yim nung World Food Day ayonga among. Nübortem dang chiyungtsü tajung achitsü aser temang anema ayutsü alizüng nung parnokji iba sentong ayonga agi.

Mizoram nung kozüjang jenti apu

Aizawl, October 17, 2021 (Agencies): Assam Rifles-i Mizoram kübok Champhai district nungi ozüng alema shibelenba kozüjang aika puogo. Assam Rifles-i apuba kozüjang ya yangkhu (bosta) 475 nung inoker liasü aser shishilembadak item kozüjang jenjang cr. 1 dak tema asütsü ta asadangteter. "Osang tejangja nung ajemdaker 8 Assam Rifles aser 2 Assam Rifles indang team anati iba tesem mita ao," ta sangdong ajanga Assam Rifles-i metetdaksü. Team-i sen 1,01,88,750/- alang kozüjang apu," ta kasa sangdong nung shia lir. Champhai district kübok Tlangsam tesem nungi item kozüjang ngutet. Tawa tanü Champhai district nung ozüng alema shibelenba oset jenti Security forces-i pu arudar. "India-Myanmar arrtsülen meima ozüng alema kozüjang shibelenba ya Mizoram state atema teblemtsü tuluka lir," ta Assam Rifles-i ashi.



TIR YIMYIM

YIMOBILEM (EDITORIAL)

DIMAPUR TENTONÜ, MONGPUTENI (OCTOBER) 18, 2021

Arogo nung tetsür

A tangji, Laishiba nung Lipok tapu nungi tenzüker yashi asenok Ao kin apokba sobaliba otsü tashi nung mezüing tebur ser külenang tetsür arur. Aji oda, tetsürji tongti masü teyarir dang südaktsü. Tetezü, tetsür lendong alidaki meyok aser mapa temerang meinyakdaktsü. Tebur mezüing aser tongti südaktsüba nükjidongji tetsürji tebur lar asütsü atema masü saka tetsürji chubatsür ama, kinungtsü ama aser jala ama akümtsüba aser meima aküpasüingtsü atema tebur nem khuret agütsüba lir. Ibayongji, tongpangibo chuba dang ao saka chubatsür dakang tashi tuluba liasü. Aji oda, putu menden nunga tatartembo teburtem dang liasü saka yimsübo kinungtsü shisatsü agi yimsü süa aru. Iba amaji, tetsür o tebur naji ana asüba agi balala, saka külemi lia külemi inyaksü asoshi Tsüngremi poktetdaktsübatem lir. Aji oda, joko alima tain akümer asünungji, alima nung süng long dena lanu asüding bilemba aser inyakba mapatem aika melenshia arudagi. Joko, akhidang amato tetsürtemia kidang ki mapa tilateri dangbo inyaka mekazüner saka teburtem den kasasa khuret lemsatepa bener. Joko, tenüing dang ashi, tebur aser tetsür na tsüingda mapa tasak aser temela bendangtsü kecha mali, teburtemi inyaktetba ajak tetsürtemi inyaktetter aser tetsürtemi inyakba mapatemala ajak teburtemia inyaktetter. Ibayongji, alima tesem aika nung yimten yimsüsüba aser lokti tentet nung tetsürtemang tokolak ser aoba angur. Iba kasaji, asenok Khristan loktiliba nunga arogo nung tetsürtemi tongti shilem agitsü tenzüko. Temelenshiba putu nung Tsüngrem tenzüka wadang nunga, joko tetsürtem arogo tenzüka deacon menden aser sannükba mapa nung tebur den kasasa shilem agitsü asoshi maongka agütsübaji temelenshi aruba tamaitü asütsü. Ibayongji, joko asen lima nunga tetsür aika taküm piyong Tsüngrem tenzüksü asoshi ordain asür aser tetsür tesayula dang masü saka arogo nung inti atema sannüker shimer. Ajisüaka, ano asenok aikati asen loktiliba nung tetsür tokolak ser aotsübaji magizüktetter, kechiyong yamaji yimten nunga aser tamangba yimsü nunga sobalibaa maru. Aji tim dang lir, kechiyong aji asenok atema tetsürtemi süpeti aser skirt dang agia liasüba ajungbena longpant semer sayuba amai lir. Ajisüaka, sema-semabo longpant agia tetsürsa tazüba amai teburtemia nükshia repranger. Aji oda, tajung aser tim süaka sobaliba ka melenshitsü atema mapang nungdaker aser iba mapang nungji tangatetba agütsüsbaji tongtibang shilem ka asütsü. Iba tangatetba nung asenok mulung lapoka sensaksemtsü atema taoba hapta, iba osangkaket tapak 6 nung " Asenok arogotem nung tetsürtem nema sannükla dang masü saka sannükba mapaa inyakdaktsü nunga koma süla ? " ta asüba tasüingdangba nung shisalemtepogo. Atangji, iba ama hapta shia "Koma süla ? " ta asüingdangba nung tazünger aikati bilemdanger saka ishikati dang yimjak nungbo telangzüba agütsür. Aji oda, iba kasa tasüingdangba nunga telangzüba ishika rongnung obang memedem aser tangatetba balala agüja angur. Aika ishika ta masü, asenokbo itemjiang nübortem mulungjanga ta agizükdi. Atangji, arogo nung inyaksü indang jembir asünungji, tongtibangtibaji Laishibai kechi ashir (?) ta asübaji asütsü. Anungji, Laishibaibo ashir, " Yihuda nunger, bendanger ta mali, alar aser nüchia ta mali, tebur aser tetsür ta mali, saka Yisu Khrista tsüingdangbo ajak kasa dang lir. Ajak Tsüngrem chirtem," ta Galatia 3 nung shia angur. Anungji, joko Khristantem lima aser lokti nungbo, ya tebur inyaksü aser yabo tetsüri inyaksüla ta masü, shibai khuretsa bilemer pai mesüra lai inyaksü. Iba tangatetba nung, joko tenyar Paul-i Korint nungertem dang ashiba ama, joko asenok tamang aser tangatetba nung tain kumadoker asünungji, tanur ama masü saka tain amai bilema tain ama inyaksü nungdaker. Arogo nung sannüker mapaji nütsüingtem ki bushia oa anükba aser parnok tenla kidangi jaoker Tsüngrem o angatetdaktsüba mapatem lir. Atangji, kiyimba aser asüpila sentong agitsüba, ki aser tanur meshitetba mapa amalaji putiriang inyakba tajungba asünungji, sannükeri inyaksür, saka itemji tongti mapa masü, saka santem anüktsü aser mesütsübjiang tongtibangtiba mapatem lir. Item mapatemji inyaksü atema Tsüngremi shiba nem nunglokja lir aser shibai khuretsa bilemer, tetsür tebur ta mali, ozü tzükong, par tzükong ta masü, ozü kinunger par kinunger ta-ka masü, sannükba mapaji pai mesüra lai inyaksüla.

OLEMSABANG

LGBTQI+ Tebilemstsü aser Tanü Lokti

~ Matsüing Longkumer

Okila

Tanü asen tensa nung tebilemstsü jendi ajur. Karbo oda satoksatoka mejembitetba tebilemstsütem lir. Satoka kechiba mejembitetba ta süra tashitakji kanga tulu mesüra tesempatsü mesüra ai aketba onük ta angatettsü akok. Ano karbo aseni magizüktetba agi temulung magütsür aser rakkoka mejembii yutsür. Item ya ajanga lokti nung kar jendoka yutsür aser timtem adoker. Iba ama asen lokti nung jendoka yuja telok kaji LGBTQI+ telok aser parnok angatetyim ya lir. Yanglushidi Sensaksem Sabang (YSS) nung iba onük nung ajemdaker parnok ya shir mesüra parnok ya asen lokti nung koma shilem agitettsü ta sensaksemba nung ajemdaker iba ocet ya zülur. Iba telok indang jembidang kar atemabo aoksatsü-a alitsü mesüra kar atemabo meteta aliba lephsir amai asütsü akok. Parnok indang ya arok aroka shisadanga asen lokti ajak nung sadoka litettsü lemang asameyangtsü nungdaker aser Arogo tenyaba mapa nung shilem lir ta ajiteter.

LGBTQI+ tem ya shir?

Parnok tenüing tetshidang aikati aker aser karibo meshii angur. Saka parnok ya yimya balaka nung libaliro a liaka nisung rongnung ka lir. Parnok ya angatettsü kanga melarbo masü kechiba süra iba telok nung tapu aika loktepa lir. Anungji parnok rongrü ka nung rü angatettsü merangra tamokoktsü aser tima masü. LGBTQI+ tetezü Lesbian (tetsür o tetsür na medemba), Gay (tebur o tebur na medemba), Bisexual (tetsür aser tebur na prongla dak saklokba), Transgender (tetsüri tebur mesüra tebur tetsür akümba mesüra reprangtsübo tebur amai saka tetsür shilem bener asortem mesüra tereprangtsübo tetsür soru saka tebur shilem bener asortem), Queer (sobaliba/loktii magizüktetba yimya), Intersex (tetsür aser tebur shilem mebendangteti asortem) aser yamala telok dang ajar.

Parnok ya ajak ka amai dang züingshia yongrü ka nung dang yutsür. Saka iba telemsa nunga talisa, Transgender aser Intersex tsüingda, ongdang tulu lir. Tat.agi, Transgender yabo tetsür shilem bener asortem tebur akümba mesüra reprangtsübo tetsür sorubangro (physical appearance) saka tebur alir, yamaji tebur shilem bener asortem tetsür akümba mesüra tereprangtsübo tebur amai saka tetsür parnok dang ajar. Intersex yabo khenyongi balaka. Aiben parnok ya taso dang yongi tetsür asü tebur mebendangteter. Ano karbo tain aküm dang, talisa kum 13-14 tsüingda tashi (puberty) nung iba jenjang meteta arur. Tat.agi, pei osetji telong lenbo tebur ser nung temalen bo tetsür oset alir. Parnok tai kecha mali nung lokti nung meshi-i repranger aser mezüingshir aser pongma kümdaktsür. Parnoki dangar dang meshitetba timtem ajangshir aser aikati iba tejashi timtem khuret lepi bener air. Iba ya nüburtemi aroka mangatet tashi parnok lokti nung shilem agitsü mesademmer.

Sobaliba aser Loktiliba Angatetyim

Lokti nung sobaliba ya kanga tongtibang. Sobaliba ya lokti ajak nung kasabo malir. Lokti ka nung tajunga ta sabua benschibaji danga lokti nungbo khenyongi magizüktetba alitsü akok. Anungji iba lokti yimya mesüra sobaliba ya shibai yanglu ta asüingdangtsüla (who constructs social norms and consciousness in our society?). Koba sobaliba südir süang item ya lokti-i molutetba yimya lir (socially constructed norms and sanctions). Aiben iba sobaliba ya nütsüing timbai mulungba mesüra taginüba agi atsünga moluteter (dominant perspective). Saka tanü pei temeten aser nübur temeten (human rights) meteta amshitsü merangba tensa nung asen lokti noktaka lir. Aiben iba temeten ya amshi dang teimbai aginüba sobaliba (dominant perspective) den tsükteper. Aseni benschia aruba yimya (norms and value system) tem benschitsüji kanga tajung. Saka pei jurila temeten jia nungdaker. Süra asen sobaliba mesüra yimyatem aser pei temeten amshiba ana ya koda loktepa bendshitettsü? Mesüra tena kong ajurteptettsü? Iba tatsütepba ya tanü aseni asangsang ajurudar.

LGBTQI+ telok aser parnok okrongba

Parnok pei taginüba tonger aser ataloker kanga jangratema alir ta aikati bilemer. Saka asangsang nungbo parnoka kanga okronger aser shisabulu khuret agi sünga lir. LGBTQI+ tem timtem tekangshiji aki (normal) nisung dang nungi kangasa tuluba lir ta metetdi. Parnok timtem aser shisabulu lemsatepdak mali kangshir. Iba yongji parnok lokti nungi atsünga telongi iadoker. Parnok okrongba kar yamai:

Social Issues

Lokti nung parnok ya magizüker. Parnok temeten mamshiteter. Karbo kanga mejungi benschir; atalatsür, menütsür, mesüra karbo kidang nungi meinzüka yokba otsüa lir. Shisaluyimdak pur medemeri asayatsüba agi tum nung anentsüsa akümer. Benjong bentsü nung parnok jilo yia asatsü oset kümdaktsür. Sorkar mapa aser private sector nung mapa mangur anungji aiben meshimetsüa takum alitsüsa adoker. Lokti südoksünemdak (public space) nung parnok satoka makazüteter. Item timtem ya ajanga parnok kanga okronger aser kangshir.

Emotional issues

Akümliria oadokogo ta aser asüria tonga maru ta jembiba amato parnok taküm ya tetsüingda ka nung alir. Anungji tebangi meshitetba timtem ajangshir. Pei sasa taküm reprangdanga sasar (feels guilty); kechiba aso ta bilemer; khuret lemsatepdak mali; parnok takümüji mejangjai temangmang nung dang alir (confused). Iba ya ajanga parnok temulungjang animesüingzüker (emotional stress) mesüra pei sasa aitsüba tia ajurur. Tsüngrem nai nibo kechiba yanglu ta terata nung südok tajungba ta bilemer.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



DABA Arogoi rongsen tulu tenla agüja Rev.Imli Jamir aser Mr.Wati.T Longchar Home Evangelist, dena lenisüba nung Kelingmen Baptist Arogo nung Father School October 14-17 2021 tashi Tebutem 66 tashi dena kanga dang temoatsü aser takok ngudakja sentong katsüba asoshi kangasa pelaba lemsateper. Tsüngremi DABA Arogo maneni moajangma, ta Kelingmen Baptist Arogo nung pastor, Jongshimanen Lkr-i sangdong ka ajanga lemsatep.

Uganda nung pastor ka tepsetba ken o nung nisung ana apu

Nairobi (Kenya) October 17, 2021 (Agencies): September 12, 2021 nü Uganda linük pastor ka tepsetba ken o dak sendakba nung nisung ana puogo; pastor-i Muslim nung aika temelung meyipdakja Khristan kümdaktsüba agi tebur ana jagi pa amokmerena liasü.

Nangonde Sub-County kübok Namakoko B yimdak Church of Christ Arogoi anasa aliba Namwenda yimdak Arogo ka lenitsü atema pastor, Barnabas Musana yoka liasü. Iba sülen pai yim anaprongla nungji mission mapa inyakba agi Muslim nungertemi pa dang mepelai liasü, ta Namwenda yimdak Life of God Ministry nung pastor, Simon Okot-i metetdaksü.

Pastor Musana-i evangelistic sentongtem agiba aser Khristan o Islam yimsü na dak sendakba o toktepba sentongtem nung shilem agiba ajanga Muslim nung aikiati Khristan yimsü dangi meyipa liasü, ta pastor Simon-isa metetdaksü.

Osangbener den jembidang Simon-i, "Yaküm February ita nung Musana-i, Yisu Khrista ya Tsüngrem chir, anungji ainkar Muhammad dang nungibo Yisu tongtibangba, ta jembiba ajanga Muslim nungertem kanga jashia liasü," ta metetdaksü.

"Parnoki kanga jashia pa dak arroktsü, iba mapang nungji pa kümzüksü atema Arogo züngsemtemi pa anir jena ao.

Iba mapang nungjagi tenzüka Muslim nungertemi shidi ajanga pa amokmerena liasü," ta paisa ashi.

Pastor Musana-i evangelistic mapa anenba sülen sayutsüngirtem nem ang training agüja liasü aser ita trok tsüngda Muslim nung 15-i Khrista agizük, ta Pastor Okot-i ashi.

"Ibaji ajanga Muslim nung kanga jashi aser iba tesem toktsür oang ta shia pa amokmeren. Musana dak shirangertem aneptsüba sempet-a liasü. Nikongdang shia pai nüburtem tebilemsü balala atema sarasademtsü aser nisung aika sayatenya agi taneptsü ngua liasü. Sarasademdaksü atema Muslim nung karibo pa miima ajurua liasü aser karibo Khristan yimsü agizükba sülen miimshia tekülem sentong nung dena liasü," ta paisa metetdaksü.

Muslim nung aikiati Khristan yimsü agizükba sülen taküm June ita nungi Muslim nungertemi Namwenda yimdak pastor Simon Okot'er Arogo anema apuso.

July ita tatemanglen nungi Muslim nungertemi Pastor Musana'er kibong züngsemtema amokmeren tenzüka, ta Pastor Simon Okot-i ashi.

Ibayongji Arogo lenirtemi Pastor Musana dang evangelistic mapa tera ajemtsü

aser ango apuba business tenzüksü ajungshia liasü.

September 12 anepdang 7:00 ako nung Pastor Musana den nisung ana ango apu Mpologoma ayongi oa liasü, saka nikongdang 2:00 ako tashi nung Pastor Musana meyipa maru.

Pastor Musana kinüngtsü Gaju aser Kowa Mugooda na dak melung malem tenzüka aser Khristan lenirtemi pa bushitsü atema ayongi aoba mapang nung iba tesem nungji Pastor Musana tasü mang angu. Nisung kari pa tekong nung lisü agi alenseta südaksü aser temang nungji zübo aika liasü.

Iba sülen Ivukula police station nungi police-i Gaju aser Mugooda na apu aser tena anema ken o benokba sülen kobi melii ken o angadangtsü.

Osangbener den jembidang area chairperson-i, "Ni yimdaklirtem dang tai tonglokja alirtem ki teraksatsü ta tuyuogo, kechiyong pastor tepsetba anema lanur Khristan kari mosque raksaja liasü," ta metetdaksü.

Pastor Musana-i kinüngtsü den tanur tila asem toktsür asü.

Uganda linük temzüng nung peii melungba tamangba yimsü benshitsü aser pei yimsü tangar den lemsateptsü atema temeden agüja lir. Uganda nung Khristan nütsüng timba lir aser linük nung nütsüng shilem 12 dang Muslim nung lir.

Haiti nung telok kati America nung missionary 17 puer ao

October 17, 2021: Haiti nung prangpong amer telok kati America nung Khristan missionary 17 den parnok kibong züngsemtem puer ogo, ta osang ka ajanga metetdaksü.

Ohio nung aliba Christian Aid Ministry balalai, lajartem anepaluba ki ka semdangba sülen parnok meyipa aoba mapang nung tanur aser tetsürtem densema aika puer ao aser tang parnok Port-au-Prince anasa lir, ta metetdaksü.

"Mission field director aser American embassy na

longjemer parnok kümzüksü atema inyakdar," ta parnokisa metetdaksü.

Honibarnü (October 16) Khristantem jagi Croix des Bouquets area nung aliba orphanage home ka semdangba sülen gari nung Titanyen-i meyipa aoba mapang nung parnok puer ao, parnok rongnung tanur asem densema lir.

UN Security Council-i vote agütsütepa Haiti linük nung mission ita 9 atsülangba sülen anogo ka dang lirbo America

nungertem puer ao.

Taküm July ita nung Haiti Tir, Jouvenal Moïse tepsetba sülen iba linük nung loktiliba aser yimtenren nung makmakshishi tulu lir aser Haiti nungertemi US dang tensa tajungba akümstü atema sepaitem yokang, ta akhanger.

Haiti Ato kilonser, Claude Joseph-i US dang sepai yokang ta mepishibaji US-i magizük saka US-i tensa asadangtsü atema dang security ketdangsertem yoktsü, ta langzüa liasü.

ANOGO ABEN TSÜNGREM DEN

Atangji ken ken ibai tasak

Saka temeim nung ochi jembia ajak nung Pa dak asenok aintsü Paji tekolak, oda Khrista.

Efesa 4:15

Telungjem nung inyaktsü Pauli Efesa nung ayongzük. Pai temang ka nung shilem balala aliba agi atishia jembia. Shilem shia mapaa balala lir. Kar tenyartem, kar ainkar, kar sayutsüngirtem, kar pastors aser kar tesayurtem. Arogo mapaji tenzüka mapa asoshi temeshipur renemtsütsübaaji lir. Saka ano Pai kija den jembir, "Saka ochi jembia." Arogoji (temang) teti ochi jembitsüla, saka kija züngsemtemi (temang shilem) maneni ochiji sayutsüla.

Yisuji ochi! Tanela Temeshiji ochi Tanela (Yn. 16:13)! Khristan ama asenoki ochi kübok alitsüla. Aseni jembiba otem ochi asütsüla. Ochi jembitsübaaji tetibo temela masür, aji oda süaka asenoki ochiji jembitsüla - temeim nung- shirnoki ibaji angashitsü nungdaker. Ibai mekümzüki aliba kibong nung züngsemtemi, tembartem, külem mapa inyakerem, aser ibai tetibo temela masür. Saka parnok tatemang alizüng jagi asenok ajungshidaksütsüla. Ano asenoki Khristan shirnoki yimya süpaa tiyazü jembir parnok den ochi jembitsü mulunga alitsüla (Gal. 6:11). Saka asenok alizüng teti Khrista nung anitsübaaji asütsüla. Asenok maneni Khrista mesüka alitsüla, aser ibaji asenoki anogo shia Pa O nung mapang endokba ajanga kümtet.

Tsüngrem, ni teti temeim nung kechi ochi aser kechi nungdak aji jembia tsüngchir süa linür. Tanü kü dang yariang ta ni sarasademer. Amen.

Myanmar nung sepaitemi Baptist Tenla ki ka rongdoktsü

October 17, 2021: Tang Myanmar linük nung sepaitemi yimsüsüba anema nokdakertem samatsütsü atema inyakba mapang nung Chin state nung Burmese Army (Tatmadaw) sepaitemi civilian aika pudar aser ki aika rongdoktsüdar.

October 13, 2021 nüa Chin state kübok yimsüng ka nung sepaitemi Baptist Tenla ki den ki aika rongdoktsüba sülen civilian aika puogo.

August ita nungi tenzüka Tatmadaw sepaitem aser Chinland Defense Forces (CDF) tsüngda rara tesashiba tenzüko. Chin state ya Khristan nütsüng timba aliba state ka lir, aser iba state nung nüburtemi sepai yimsüsüba anema sashia nokdaker.

Ibayongji sepaitemi CDF züngsemtem dang masü saka civilian anema-a inyaker. October 13 nü Hakha yimti aser Falam jila na tsüngda highway nung raraba mapang nung truck 80 shi nung sepaitem Mindat jila tonga aru. CDF züngsemtemi Falam nungi mile 3 shi pilar aliba tesem ka nung sepaitem amak, iba sülen sepaitemi Hniarlawn yimdak tanur ka densema nisung pezü apu.

Raraba sülen sepaitemisa Rialti yimdak camp ka amenokba sülen ki aika

rongdoktsü. Sepaitem jagisa kiset shiruru aser tagitarutsü aika auya. Osangbener den jembidang Rialti Village Baptist Church nung lenir kati, Bodhbar nikongdang 3:00 ako meta sepaitemi ki 8 rongdoktsü aser Brihostibar anepdanga ki aika rongdoktsü, ta metetdaksü.

"Brihostibar anepdang ozü Arogo Tenla ki den store ki rongdoktsü aser anepdang 9:00 ako meta nunga tanüngba ki asem rongdoktsü," ta paisa metetdaksü.

"Mapang tatsüka tsüngda yimdak Tenla ki densema ki ajak rongdok," ta paisa shisem.

India nung amenoka aliba Chin Human Rights Organization nung deputy director, Salai Za Op Lin-i, Rialti yimdak sepaitemi Tenla ki densema ki aika rongdoktsüogo, aser ibaji rara mapang ozüng alema inyakba mapa ka lir, ta aitsü.

Tatmadaw sepaitemi metetsümonga Chin state nung aliba Khristantem temeden anema inyakogo, ta Lin-isa metetdaksü.

Myanmar nung Khristan nütsüng aika aliba state tem-Kayah, Chin, Kachin aser Karen state tem nung sepaitemi civilian anema inyaker aser reshikangshir.

OLONG PAITEP # 5969

	1		2			3		4		5
6								7		
					8		9			
			10							
11										
					12					
13		14		15						16
17								18		

- | | | | |
|------------------------------|-------|------------------------------|-------|
| TIPLÉN | | LANGTSÜNGLEN | |
| 1. Inyaker ajangetba | - (3) | 1. Meshidak | - (3) |
| 3. Bangsemo adokdak | - (5) | 2. Tanaben soshir | - (7) |
| 6. Shitak mesüi inyak | - (7) | 3. Iba anogo | - (4) |
| 7. Ya mimong nung angur | - (3) | 4. Meshi | - (3) |
| 9. Reprangzük | - (4) | 5. Yagi mi tsükloker | - (9) |
| 10. Tasola | - (5) | 6. Shi tapu ka | - (9) |
| 11. S _ _ _ _ | - (4) | 8. Yagi ayimer saka ozü masü | - (3) |
| 13. Yagi ajak ashioksür | - (3) | 9. Ajokba shiruru ka | - (7) |
| 15. Ki aokba oset | - (7) | 12. Inyaktet | - (4) |
| 17. Ak shi nung inokba tasen | - (5) | 14. _ _ _ hi | - (3) |
| 18. Ishika | - (3) | 16. Akümüli nungi pilar | - (3) |

OLONG PAITEP # 5968 TELANGZÜBA

- | | |
|---------------------------------------|--------------------------------------|
| TIPLÉN : | LANGTSÜNGLEN : |
| 1. Telok, 4. Aluru, 6. Ozüng, 8. Emk, | 1. Tenükjang, 2. Luden, 3. Kioksü, |
| 9. Kin, 10. Teti, 12. Süir, 13. Jen, | 5. Lenti, 7. Tajangzük, 11. teronem, |
| 14. Ola, 16. Talak, 17. Mazük. | 12. Sempa, 13. Jahaz. |



SOBANGBA O ALOKBA NA OCHIBA BUSHIR

- Sobangba** -Hai Alok Laishiba nung ochiji aliang aser aji teyok ta shia lir tu na?
- Alok** -Haito shia lir ati,
- Sobangba** -Süra aji kong alitsü?
- Alok** -Hardware dokan amala nung asüngdangang ma!
- Sobangba** -Ni hardware dokan nunga asüngdangoko, Hongkong market nunga asüngdangoko, New market nunga asüngdangoko, Shi alepdak ajak nung asüngdangoko, ajak nungji shitakba dangashi Ochiba-bo malia.
- Alok** - Factions tem danga asüngdang masüngdang?
- Sobangba** -Factions ajak dang asüngdangoko parnokjia Ochiba mali Shidakba dang lir.
- Alok** -Government danga asüngdang masüngdang?
- Sobangba** -Government nungjia Shidakba o Adjustment dang lir.
- Alok** -Oh.... Süra Ochiba kong angutsü!??
- Lilir : Asangla, Mangimen.**

TANÜBO NAI LANGZÜANG

- Q. G Satheesh Reddy-i kodang Aryabhata Award agizük.**
- A.October 08, 2021** **B.October 09, 2021**
- C.October 10, 2021** **D.October 05, 2021**
- (Taruba adok nung onoki langzüsü)
- YASHI ADOK TELANGZÜBA: 135**

AO OSHI ANGAZÜKDAK:
TANÜ ANGAZÜKTSÜBA OJANG

Lasa
(adv) tanemi, tashi agi masü (gently)
* La **lasa** arur kü den amen.

Lasang
(n) lasangjang akhaba oset (crossbow)
* Akhidangbo tongpang nung **lasang** agi dang rara.



Happy Birthday

TENÜNG : LONGPOK TSUYONG
Küm : 1
Talidak : P.W.D Ward, Changtongya Town

Tsüngremi tanü Longpok taküm küm ka ajungba tashi arishi moatsü nung Tsüngrem tenüng asanger. Ano maneni tarutsü nunga Tsüngremi Longpok taküm arishi moajangma ta ozü sarasadem.

~ Temeim otsü Anungla & Onü Aien (Dimapur)



NAI-A YA METETTER MA

INDIA NUNG NATIONAL HIGHWAY TONGTIBANG KAR:

1. NH 44 (old NH 7)	3,745 km (Srinagar to Kanyakumari)
2. NH 27	3,507 km (Porbandar, Gujarat to Silchar, Assam)
3. NH 48 (old NH 8)	2,807 km (Delhi to Chennai)
4. NH 52	2,317 km (Sangrur, Punjab to Ankola, Karnataka)
5. NH 30 (Old NH 221)	2,040 km (Sitarganj, Uttarakhnad to Ibrahimpatnam, AP)
6. NH 6	1,873 km (Jorabat, Meghalaya and terminates at Selling, Mizoram)
7. NH 53	1,781 km (Hajira, Gujarat and Pradip port, Odisha)
8. NH 16 (Old NH 5)	1,711 km (East coast, West Bengal to Chennai, Tamil Nadu)
9. NH 66(Old NH 17)	1,622 km (Panvel and terminates at Kanyakumari)
10. NH 19 (Old NH 20)	1,435 km (Delhi to Kolkata)
11. NH 34	1,426 km (Gangotri Dham, Uttarakhnad to Lakhnadon, Madhya Pradesh)

SUDOKU # 6010 TELANGZUBA # 6009

8	2	5					6	4	5	6	9	2	3	8	1	7	
			9		3	2	7	8	8	9	2	7	6	1	3	4	5
			8	2	6	1	5		3	1	7	4	8	5	2	9	6
			2	6					9	3	5	1	7	2	6	8	4
	8	9	5	1		4	2		7	4	8	5	9	6	1	2	3
7		2			4		6	5	6	2	1	3	4	8	7	5	9
	5		4			6			5	6	3	8	1	4	9	7	2
2		6			8	5	3	7	2	8	9	6	5	7	4	3	1
				3	5		4	2	1	7	4	2	3	9	5	6	8

OJANG LUTEP # 5555

- EASN :
- BAAKA :
- GINUN :
- TEMETIMR :
- NDE :
- LETEMSAPBA :
- NGAJAA :
- ENAS :
- SAKESEN :
- MTSMAKÜÜ :

OJANG LUTEP TELANGZÜBA # 5554

TAKÜM NUNG KHEN MEKÜMDANGI INYAKER ASÜDANG TEMOATSÜ MASÜ ATAKATEM JAOKER

TAN HOPTA ATEMA - KOMA SÜLA ?

Q. Tang amai Nagaland nung oposition telok mali ser assembly election agitsü mapang tonga arununga koma süla?



October 17, 2021 nü Chamoli district nung rifleman Yogambar Singh (27) asüpila sentong agidang tangokba noksa nung angur. Hokolbarnü Jammu & Kasmhir kübok Poonch district nung kiralongrartem den raradang Singh khaseta liasü.

UP election atema nüboyimer tongtiji Priyanka Gandhi asütsü

New Delhi, October 17 (Agencies): Sangküm Uttar Pradesh assembly elections nung Congress party atema nüboyimer tongtiji Priyanka Gandhi Vadra asütsü, ta Amongnü UP election campaign committee tongti, P L Punia-i metetdaksü.

Tang Uttar Pradesh nung yimtenren tsütsü tongti lenirji AICC general secretary, Priyanka Gandhi lir, ta paisa metetdaksü.

Hokolbarnüa züngsem 20 aliba UP election campaign committee nung Punia tongti shima liasü. Election jakdang Congress-i aiben chief minister candidate mesangdonger, aser tang tashi CM candidate shima mali, kechiyong state nung BJP anema raratsü atema Priyanka Gandhi ama lenir tajung lir, ta pai metetdaksü.

UP election nung Congress aser BJP na tongti party asütsü, kechiyong Samajwadi Party

asér Bahujan Samaj Party na tesülen atsüngzüka luogo, ta pai ashi.

Interview ka nung jembidang Punia-i, tongtibang onük ajak nung Priyanka Gandhi-i ochi atema rara aruogo; Lakhimpur Kheri tatalokba mapang nunga lai takoksa anguba kibongtem semdanga liasü, iba mapang nungji la Sitapur nung apu, saka lai ochi temeden atema maneni rara, ta ashi.

Sonbhadra nung tatalokba süaka Unnao mesüra Hathras nung tatalokba süaka lai ajak atemaji temeden asoshi raraogo, ta pai ashi.

"Anungji nüburtemi la mapa agi melung asür, aser tang state nung yimtenren lenirtem rongnung Priyanka Gandhi ama nungtugu mali. Election nüboyim atema Priyanka Gandhi mapang ajak nung alitsü," ta pai ashi.

Punia-i, taruba election nung Lakhimpur Kheri tatalokba aser

aluyimertem temeden ya tongtibang onük ka asütsü, kechiyong aluyimertem menüngsetba ya aitsütsü tetemsü, ta ashi.

"Ano tesümgangtsü kaji, tashi alirtemi aibelenertem kümzüka ayu. Chief Minister Yogi Adityanath-ia, kuli makaibo shinga maputsü, ta jembia liasü; iba tetezü Union minister ka jabaso aputsüji tim masü ta pai shiniüba lir," ta Punia-i ashi.

Iba ken o nung tai tonglokja alirtem kümzüka tsütsü Chief Minister Adityanath aser Union minister of state for home, Ajay Mishra napronglai aibelenogo, ta pai ashi.

UP election campaign committee nung convenor Pradeep Jain Aditya shim aser züngsemtem rongnung Mohsina Kidwai, Pramod Tewari, Raj Babbar, R P N Singh, Naseemuddin Siddiqui, Imran Masood aser Imran Pratapgarhi nungera densema lir.

Nov. 5 nü PM Modi-i Kedarnath nung project aika semzüksütsü

Dehradun, October 17 (Agencies): November 5 nü Ato kilonser, Narendra Modi-i Kedarnath semdanga sarasademtsü aser sen crore 250 indang Kedarpuri reconstruction projects semzüksütsü, ta ketdangsertemi metetdaksü.

Pai tang agi tanaben state semdangtsü; October 7 nüa pai Rishikesh nung All Indian Institute of Medical Sciences

(AIIMS) semdanga oxygen plant ka semzükja liasü.

Taruba ita Modi-i Kedarnath semdangtsü aliba dak sendakba nung Chief Minister, Pushkar Singh Dhama-i, Ato kilonseri Adi Guru Shankaracharya indang 'samadhi' densema Kedarpuri reconstruction project aika semzüksütsü, ta metetdaksü.

Ato kilonserisa maneni tanabuba shilem kübok sen crore 150 indang Kedarpuri

reconstruction projects atema foundation lung azüngtsütsü, ta Chief Minister-isa metetdaksü.

2014 küm Ato kilonser akümba süalen Modi-i Kedarnath aiben semdangogo aser Kedarpuri reconstruction projects inyakba ya pai mita repranger.

Kedarnath indang portals ya November 6 nungi tenzüka asükwa mongpu piyong shibangtsü.



October 17, 2021 nü Patiala nung taoba mapang Punjab Chief Minister, Amarinder Singh'er jala, Jai Inder Kaur-i taruba Punjab assembly election atema tebu asoshi nüboyimtsüba noksa nung angur.

Kashmir nung ano nisung ana khaset

Srinagar, Mongputeni/October 17 (Agencies): Jammu & Kashmir nung shishilembar ana khasetba sülen anogo ka lir Amongnüa Kashmir kübok Kulgam district nung kiralongrartemi tanga state nungi arua aayanger ana khasetogo.

"Kiralongrartemi Kulgam kübok Wanpoh nung bendanger aayangertem dak injang khaloktsü. Iba mapang nungji bendanger aayanger ana khaset aser ka yiru," ta police-i metetdaksü.

Srinagar nung BJP otongdar, Altaf Thakur-i, Kashmir nung maneni lisopur masüba nisungtem tepsetba ya onoki

sashia aitsür, ta metetdakja police dang civilian tepsetba nokdangtsüla aser aibelenertem pua temerenshi agütsütsüla, ta takhangba agütsü.

October 5 nüa kiralongrartemi Kashmiri pandit, Makhan Lal Bindroo khasetba sülen ghonda ka tsüingda Bihar nungi aruba Hindu nunger ka khaset; iba sülen Bandipora district nunga Muslim nunger taxi anishir, Mohammad Shafi Lone khaseta liasü.

Iba sülen anogo ka lir kiralongrartemi school ka nung principal Sikh tsür, Satinder Kaur aser tesayur Kashmiri pandit, Deepak Chand na khaseta liasü.

India nung ano nisung 14,146 dak Covid putet

New Delhi, October 17 (Agencies): India nung ano nisung 14,146 dak coronavirus putet aser iba tashidak agi shiranger 166 süogo, ta Amongnü Union health ministry-i metetdaksü.

Tang tashi nung linük nung nisung 3,40,67,719 dak iba tashidak putetogo aser shiranger 4,52,124 süogo, ta Health Ministry-isa metetdaksü.

Tesüiba ghonda 24 tsüingda coronavirus agi shiranger 19,788 anepogo aser tang tashi nung nisung ajak senteper 3,34,19,749 anepogo.

Tang India nung coronavirus agi teshirangdakpur 1,95,846

dang kümogo aser ibaji tesüiba anogo 220 tsüingda tajemtiba lir.

Tang tashi nung linük nung coronavirus vaccine dose 97,65,89,540 agütsüogo aser iba nungji tesüiba ghonda 24 tsüingda dose 41,20,772 agütsüba densema lir.

October 16 tashi nung samples 59,09,35,381 tendangogo aser iba nungji Honibarnü samples 11,00,123 tendangba densema lir, ta Indian Council of Medical Research-i metetdaksü.

Tang hopta shia coronavirus positive putetba shilem 1.42 dang lir aser anogo shia positive putetba shilem-a 1.29 dang kümogo.

Kerala nung tzünglu dak sendakba lendong nung nisung 19 süogo



October 17, 2021 nü Kottayam district nung anentsüh aluba sülen Rapid Action Force (RAF) aser Kerala Fire & Rescue sepaitemi kümzüka maparen inyakba noksa nung angur.

Thiruvananthapuram, October 17 (Agencies): Honibar nungi tenzüka Kerala nung tzünglu sashia aruba dak sendakba lendong balala nung nisung 19 süogo; Kottayam nung nisung 13 asü aser Idukki nung nisung asem asü.

Amongnü Union Home Minister, Amit Shah-i, Centre-i akokba tashi Kerala nem teyari agütsütsü, ta metetdaksüogo.

Twitter ajanga Shah-i, "Sorkari Kerala tesem balala nung tensa maneni mita reprangdar. Tzünglu sashia arua tzümetsüng ajanga taküm samaba den kiojen jenti raksatsüogo," ta metetdaksü.

"Central sorkari teyari nungdakbapurtem akok tashi yaritsü. NDRF teams-i kümzüka maparen inyakdar. Ajak kümzüka alitsü atema

sarasademtsür," ta pai metetdaksü.

Kümzüka maparen inyaksü aser teyari agütsütsü atema National Disaster Response Force (NDRF)-i team 11 Kerala-i yoka lir.

Amongnü Koottickal aser Kokkayar panchayats nung anentsüh lendong nung nisung aika samaogo aser anepdang nungi tenzüka Army, NDRF, police aser Fire Force den temelungertemi kümzüka maparen inyakdar.

INS Garuda, Kochi nungi Navy indang helicopter ka nung nungdak balala bener tzünglu agi kongshiba tesemtemi apusoa ao. Air Force Chopper Mi-17 ana Thiruvananthapuram nung aliba AF station tonga ogo aser helicopter anaji nungdak nung amshitsü renema lir.



Italy nung labor union tongtipai yimtung süa jajaba sentong ka Rome kübok St. John Lateran square nung ayongzükdak nüburtemi shilem agiba noksa nung angur. Mapa inyaker tem asoshi health pass meshiba ajanga longkak aiter hopta ka sülen ano fascism yimya nung inyaksangshi tali akumba anema mapa inyaker aser nübur meyrirjang aikati iba sentong nung shilem agia liasü.

Sri Lanka-i totzü alitsü atema India dang sen million \$500 apuner

Colombo, Mongputeni/October 17 (Agencies): Sri Lanka nung foreign exchange dak sendakba nung mepetmesü tulu adoker aliba mapang totzü alitsü atema parnoki India dang nungi USD million 500 apuner. Energy minister Udaya Gammanpila-i anogo ishika tejakdang linük nung aliba totzü taruba küm January ita tashi dang peritsü ta osang agütsüba sülen tang sen aputsüba ken o adokogo. State meyong Ceylon Petroleum Corporation (CPC)-i sorkar bank Bank of Ceylon aser People's Bank nem USD billion 3.3 agütsüsi lir. State oil distributor temi crude totzü ya Middle East nungi bener arur

aser asüngteter aliba totzütem Singapore densema tanga tesem nungi bener arur. "Onoki tang India-Sri Lanka economic partnership kübok Indi dang USD 500 aputsü atema Indian High Commission den tongtepratepdar," ta CPC mendenbuba Sumith Wijesinghe-i ashiba local news website newfirst.lk sangdong ka ajanga metetdaksü. Paisa, iba sen ya tenüngdakba petrol aser diesel alitsü, ta ashi. India aser Lanka na indang energy secretary tem sen aputsü atema yakta tenangzüktepba ka yanglutsü imlar, ta Finance Secretary S R Attygalle-i ashi.

Sorkari taoba gopta sorchiok dang amshiba gas aser tanga oset nung jenjang ajungkettsüogo, ajisüaka totzü jenjang majungkettsüi lir. Alima ajunga nung totzü jenjang ajungketba ajanga Lanka-i taküm tangalen nungi totzü bener arutsü atema sen aika intoka liasü. Linük indang tokzü bill taoba küm dang nungi shilem 41.5 agi timba küma taküm mezüngbuba ita tenet nung USD billion 2 ajung. Wara poktetba ajanga tourism dak kanga mejungi konshiba ajanga Lanka nung foreign exchange dak kanga mejungi kongshio, ta Finance Minister Basil Rajapaksa-i taoba ita ashi.

Taiwan-i US dang F-16 fighters tekaratiba nung agütsüsi mepeshi

Beijing, Mongputeni/October 17 (Agencies): China-i amokmerenba mapang ka nung osang ajanga ashiba agi, Taiwan ketdangsürtemi Washington dang US nung yangluba F-16 jets tem Taipei nem tekaratiba nung agütsüsi mepeshiogo. America nung yangluba F-16 tem Taiwan nem tekaratiba nung agütsüsi atema US Tir Joe Biden indang administration-i Taiwan nung ketdangsürtem den sensaksemogo, ta Taipei Times sangdong ka ajanga metetdaksü. "Fighter jets 22 ayoktsü atema 2019 küm temelaba agütsü, saka China-i amokmerenba mapang ka nung Taiwan-i item tayimtsütem takaratiba nung aginer; koba yanglutsü atema yimya agi küm 10 shi agir," ta osang nung shia lir. China-i parnok indang military modernize asüba den Taiwan dak rangloker training ajungketshiba Pentagon indang Indo-Pacific Command-i kanga junga meita ata aliba mapang ka nung tang iba ya ken o ya benokogo, ta kasa sangdong ajanga metetdaksü. October 1 nungi 5 nü tashi nung Chinese People's

Liberation Army (PLA) military aircraft 150 shi Taiwan indang air defence identification zone-i aitogo, ta Taiwan indang Ministry of National Defense-i ashiba Taipei Times-i sangdonga liasü. Ita tetenzüklen China-i ozüing alema Taiwan litsüi aiba ya tang tashi nung ozüing alema inyaksangshiba maparen tulutiba asütsü. China nungi pilar aliba linük kong nütsünyongsük million 24 shi lir, iba asetkong aser China na ya küm 70 dak tema balala yimsüsüa arudar, ajisüaka Beijing-i Taiwan ya parnok meyong ta ashiba mapang ka nung tang mepetmesü adoker lir. Kasa mapang nung Taipei-ia China nung nokdangtsü atema jenjang agia US densema tanga linüktem den tesendaktep yangluogo, koba Beijing-i magizüki arudar. China-isa, Taiwan nüjiso anguba tetezü rara asütsü ta amokmerenogo. June 1 nü China tir Xi Jinping-i, Taiwan ya parnok küboki anioktsü nangzükogo aser iba asetkong nüjiso atema nokdakba raksatsütsü, ta ashi. Tawa Taipei-ia, parnoki rara metenzüktsü saka parnok renema lir ta shiogo.

Bangladesh nung Durga Puja azüdokshi manener

Dhaka, Mongputeni/Oct. 17 (Agencies): Tamangba yimsü mezüngmeshi ta tai tonglokja Bangladesh nung Durga Puja mapang mejangjaba Muslim nung kari kin tilaba, Hindu nung tekülem ki raksaja anogo aika anisüngzük makai azüdokshia aruba mapang ano tekülem ki raksatsü, anungji linük tesem ajunga nung achi-ajem mesüi longkak aittsü sangdong, ta Deobarnü osang ajanga ashi. Bangladesh nung Durga Puja benjong amungtsü mesemteta aliba tesemtem nung lendong agütsüba anema longkak aitba mapang Honibarnüa linük yimtiba nungi kilometre 157 shi pilar Feni nung aliba Hindu nung tekülem ki aser dokan tem raksatsü aser rakzük-raktem asü, ta Dhaka Tribune osangkaket ajanga ashi. Iba rongrong nungya Feni Model Police Station indang Officer In-charge Nizamuddin densema nisung 40 shi yiru, ta ashi. Nikongdang 4:30 ako nungi ayatirm tashi rongrong adoka tekülem ki aser Hindu nung meyong dokan tem raksaja auyaba sülen Honibar aonung ketdangsürtemi police force aser paramilitary forces - Border Guard Bangladesh

(BGB) talila yoksema liasü, ta osang ajanga ashi. Honibarnü mejangjaba nisung kari Munshiganj kübok Rashunia union of Sirajdikhan Upazila nung Daniapara Maha Shoshan Kali Mandir nung aliba sünyanglu trok raksatsü. Durga Puja benjongmung mapang Hindu nung tekülem ki raksatsüba aser timtem agütsüba anema linük tesem ajungalen longkak aitba Honibarnüa liasü, ta ashi. Durga Puja benjongmung mapang lendong agütsüba anema linük southeastern tsütsü rongnendak yimti, Chittagong nung Bangladesh Hindu Buddhist Christian Unity Council ajanga October 23 nü nungi tenzüka mener achi-ajem mesüi longkak aittsü sangdonga lir. Iba sentong ya Dhaka kübok Shahbagh aser Chittagong kübok Andarkilla nung agitsü, ta iba council indang General Secretary Advocate Rana Dasgupta-i Chittagong Press Club nung osangbener senden ka nung ashi. Iba osang ya mesangdong tsüngta parnoki Honibarnü Chittagong nunga ghonda trok longkak aita liasü. Durga Puja benjongmung mapang ki-o-jen raksatsüba, azüdokshiba aser

rongrong adokdaksüba nung shilem agirtem nem tapet temerenshi agütsütsüla, ta Bangladesh Puja Udjapan Parishad ajanga takhangba agüja lir. Iba tentet indang tir Milan Kanti Dutta-i ashiba agi, parnoki ahangba nung sorkari telangzüba magütsüra movement tesashiba tenzütsü. "Home minister nungi

tenzüka tang yimsü tesüdak telok indang General Secretary Obaidul Quader tashi, ajaki onok dang parnoki osang ajak meteta lir, ta shiogo. Nenoki ajak meteta lira kechiba aibelener memerenshir?" ta pai asüngdang. ISKCON Bangladesh indang general secretary Charu Chandra Das Brahmachari-ia ajem-ajema mener lendong

atalokba repranga matatsü, ta tekumandangtsü shiogo. "Tamangba yimsü tesendaktep raksatsütsü mechi fundamentalists telok kati iba ama tesempatem maparen ya anir tenzüker ta amanger. Tesem kar nung item mapa tamajung inyakkad ruling party züngsem kar dena lir ta onoki meteta lir." (Maneni tapak 9 nung...)



European Anti-Trafficking Day bilemteta Kyiv, Ukraine nung "Walk for Freedom" sentong ka agidang activist tem Soviet tendak yangluba kerak yanglu ka jakdang nokdaka aliba angur. Parnoki bena aliba anüshi nung "Walk for Freedom" ta zülua lir aser banner nung "Ozüng alema nisung shibelenba ya alima tesem ajaklen lir," ta zülua angur. 1991 nungi tenzüka Ukraine nung 230,000 dak tema iba timtem ajangshio, ta International Organization for Migration ajanga asadangteta lir.

13buba 'Music Awards of Nagaland 2021' sentong agiogo



Kohima, Mongputeni/October 17, 2021 (TYO): Ajaki kanga dang yongya ataba '13th Music Awards of Nagaland 2021' sentong, Honibarnü (16.10.2021) agiogo. RCEMPA, Jotsoma, Kohima nung nisung densema iba sentong agia liasü.

Iba sentong nung, category balala lemsar temsüa alir artist tem nem award 18 tashi agütsüogo. Award agütsüba dak alaka, iba sentong nung Nagaland indang artist tajungtem talisa Atso Chasie, Keneisenuo Sorhie, Mengu Suokhrie, Kekhrie RInga aser Colored Keys nungeri shilem agiba ajanga telok saksalemdaktsü.

13buba MAN sentong nung, Femina Miss India Nagaland 2020, MC Zuchobeni Tungoe dena liasü aser la jembishinütsü sempet tajung ajanga sentong nung shilem agirtem aser adenertem atsüa aru peladaktüsügo.

Nagaland indang nungtugu kentener aser kentener tejen, Methaneilie Jütakhrie sabangi

atua 'Lifetime Achievement Award' mezüng agizükba mapang, telok noktaker pa pelashishia agizük.

Methaneilie-i, music amshia ken atentsü sempet tajung agütsüba atema Tsüngrem nem tenüngsang agütsü aser iba Award tulu agizüksü maongka agütsüba atema pai Native Trax Society danga pelaba metetdaksü.

Maneni, taoba mapang inyakba ama, taküm MAN sentong tetenzüklen red carpet nung Nagaland indang music aser fashion nungi tongtibang nübu den külemi 'social media nung ajaki jangjaa aliba nübu aser sentong nung tejaokertem jajaogo. Iba mapang red carpet nung jajar ajak noksa tangoka liasü.

* 13buba Music Awards of Nagaland 2021 Awards sentong nung takok angurtem:

1. Best EDM Song
JV Keli-o & TS Geneses for 'Maya'
2. Best Folk Fusion Song

Temsumongba Ozukum for 'Lijaba'

3. Best Gospel Song
ZT Slingshot for Believe
4. Best Gospel Song (Hindi/ Local Dialects)
Molungnen Longkumer for 'Tamang akangshiang'
5. Best Rap/Hiphop Song
Nentong Konyak for 'KOJ (King of jungle)'
6. Best Pop Song (Solo)
Temsu Clover for Dumplings for the sad
7. Best Pop Song (Duo/Group)
Meyisanen Lemtur Ft. Jpollnd & Temsu Clover for 'Years gone by'
8. Best Pop Song (Hindi/ Local Dialects)
Kumzuk T Jamir for 'Teimla'
9. Best Rock Song (Alt/ Indie)
Bozio Nienu for 'Lighthouse'
10. Best Rock Song (Metal/ Heavy) - About us for 'Gimme gimme'
11. Song of the Year
Kumzuk T Jamir for 'Teimla'
12. Best Music Video
Z World ft. Jpollnd for 'Die a legend'
13. Best Video Director
Kohdi Jings for 'Die a legend' by Z World ft. Jpollnd
14. Best Producer
Moyuchen K. Yanthan for 'Gimme gimme' by About us
15. Best Sound Engineer
Tongs Kichu for 'I'm on your side' by Trance Effect
16. Best Lyricist/ Songwriter
Sunep A Jamir for 'Guilty'
17. Best Upcoming Artiste/ Band - Orange
18. Lifetime Achievement Award - Methaneilie Jütakhrie

Imtiaz Ali-i Russian Film Festival indang ambassador inyaktsü

Mumbai, Mongputeni/October 17, 2021 (Agencies): India nung Russian Film Festival indang ambassador ama inyaktsü asoshi Director-producer Imtiaz Ali anisemogo.

Iba festival shilem ama, India audience atema genre balala indang nungtugu Russian film 10 sayatsü terenemba lir. Disney+ Hotstar nung October 16, 2021 nungi film sayu tenzüikogo aser November 27, 2021 tashi item film sayatsü.

Ali-i ashiba agi, India aser Russia tsüngda tarutsü nung cinema tsütsü longjemer inyaktsü asoshi iba festival ya sabang ka ama asütsü.

"Taoba mapang nungi Russia aser India na tsüngda taoba sobaliba tsütsü tesendaktep tajung yua aruogo. Film star talisa Raj Kapoor aser Mithun Chakraborty na Russia nung kanga nungtugu süa aruogo aser iba den külemi Russia indang music aser cinema anaprongla India nung nungtugu sobaliba ka ama aru," ta Ali-i ashi.

"Iba film festival nung shilem agütsü asoshi, Indian viewer ajak pelashishia jaoker aser linük ana tsüngda cinema tsütsü tesendaktep tali akangshitsü asoshi ajaki nungitta yaritsü mepishir," ta nungtugu film talisa "Love Aaj Kal", "Jab We Met", "Rockstar" aser "Tamasha" yanglur Imtiaz Ali-i ashi.

Russian Federation indang Minister of Culture, Olga Lyubimova-i ashiba agi, domestic content tem bendanglen sayatsü aser cinema maparen ajungkettsütsü asoshi Russian Film Festival ya tongtibang.

"International audience temi Russian film aser animation tem nung tejangraba sayuogo. Iba festival ajanga film industry aser bendanglen film sayuba tasatem tali akangshidaktsütsü asoshi nungittsü," ta pai ashi.

"BRICS ajanga cinematography wadang tsütsü Russia aser India na tesendaktep yangludat. Iba festival online format ajanga agitetsü mapang agi sempetsüba atema pelar. Iba sentong ajanga, onoki Russian project balala audience tem dang sayutetsü aser viewer tasentem tali atsüa arutsü lenmang lapoktsü," ta Lyubimova-i shisem.

Russian Film Festival indang festival director, Sarfaraz Alam-i, tarutsü nunga Russia nungi film tem bener aruagi mapang shia India nung sayatsü sentong lir, ta ashi.

"Russia indang film ajanga genre ajunga ayimjemer aser item otsü balala ya audience ajaki agizüksü aser tereprangeri aginüba ama otsü/yimya balala nung ajemdaker yanglur. Tawa tanü, Indian audience temi international content tem kanga bulua repringteper asünung, iba

film festival ajanga parnoki content tasen repringtsü aser tajangshiba tajung ka angutsü asoshi maongka agütsü," ta Alam-i ashi.

Disney+ Hotstar indang otongdar kati ashiba agi, iba sabang (Disney+ Hotstar) nung Russian film tem sayatsü maongka anguba atema pelar.

"Entertainment tsütsü audience nem jenjang tulu aketba tajangshiba tajung agütsütsü nukjidong yur onoki inyaker. Ibaji ajanga audience temi aginüba otsü tem repringtetsü," ta otongdari ashi.

Iba festival mapang, Russia indang nungtugu romance, drama aser comedy talisa "Ice", "On the Edge", "Tell Her", "Doctor Liza", "The Relatives", "Another Woman!", "Jetlag" aser tanga film tem sayatsü terenemba lir. Item film ajak English subtitle densema sayatsü renema lir.

India nung mezüngbuba Russian Film Festival ya Ministry of Culture of the Russian Federation, Cinema Fund, Moscow City Tourism Committee, Discover Moscow, Rossotrudnichestvo aser Kartina Entertainment teyari agia ROSKINO ajanga ayongzüker.

Iba festival ya 2020 küm tenzüik aser linük 14 nung takok ngua agiogo. Iba festival nung viewer 2,00, 000 dak tema kümogo.

Office of the
Changtongya Yimsen Village Council
P.O & P.S : Changtongya-798613

TEPELA LEMSATEPER

Changtongya Yimsen Yim akümba küm 100 Benjongmong koba 29th December 2021 nü amongtsü Sentong lir, iba nungtem nung tepela aser temoatsu lemsatepba November & December 2021 ita indang Yim dak Light Bill & Jang sen ajak Mr & Mrs. Tongpangmeren Jamir, Changtongya Town'er kibongi tenla tulu agütsüba asoshi yim dak alir nütsüng nübur ajaki par kibong dang kanga pelaba metetdaksür.

Tsüngremi par kibong maneni moajangma ta sarasademtsür.

Sd/-
(CHUBASOWA)
Chairman

Sd/-
(TOSHIMANEN)
Secretary



OFFICE OF THE
LANGPANGKONG TZÜKONG MUNG DANG

H.Q. Chuchuyimlang - 798614
Dist. Mokochung, Nagaland.
ESTD. 1933

LTM-i maneni lenmang yangluba mita repringtsü pangjem

Langpangkong Tzükong Mungdang (LTM) 16th, October 2021 anogo H.Q. Chuchuyimlang nung Sanen Luden senden mena Langpangkong Tzükong telongtet nung tang nungi National Highway nungi tenzüker lenmang yanglutsü asoshi shiba/koba telok (Firm/ company) tenung nung work order adoktir/ngutir parnok jagi dang inyaktsü-ashi sublet/subcontract kenyongi memelatsü. Aser lenmang yangluba tem ajak Detailed Project Reports (DPRs) nung aliba ama yangludaktsütsü asoshi aja-ayanga inyaktsü LTM Road Coordination Committee nem tashi agutsü aser iba den külemi koba yim lushi nung sa lenmang yanglutir pei yim lushi nung Putui- a kanga junga mita repringtsü pangjem.

Sd/-
(MARSANEN IMSONG)
Tir, LTM.

Sd/-
(R NUKSHI LONGKUMER)
Tongti Zülur, LTM.

Bangladesh nung... (Tapak 8 nungi...)

"Ato kilonser dang tashi mait mekumi parnok nema temerenshi agütsütsü akhanger aser protection law ka yanglua aser national minority council ka tentetsü akhanger," ta pai ashi.

Iba lendong atema Opposition tenung sena, Information and Broadcasting Minister Hasan Mahmud-i Honibarnü azüdokshi ya Bangladesh Nationalist Party (BNP) mapa lir, ta ashi.

"Kin balala tsüngta mepetmesü tenzükdaktsüba nung BNP-Jamaat dena lir. Yimtenren tsütsü Ato Kilonser Sheikh Hasina makokba ajanga BNP-Jamaat-i mangatetep lenmang shim."

Comilla lendong nung yimtenren tsütsü tasa ka liasü, koba ajanga linük ajungalen kin balala jashidaktsü, ta minister-i ashi.

Tekülem ki raksatsür aser ozüng amshir dak kongshirtem CCTV footage nungi jangjatetogo, ta Mahmud-i ashi.

Iba azüdokshi tasa yanglurtem nema tapet temerenshi agütsütsü, ta pai ashi.

Tamangba yimsü mezüngmeshiba ken o ka mechi anogo aika rongrong adoka aliba mapang Bangladesh nung Durga Puja benjongmung Hokulbarnü tembangogo, aser administrative district tesa dang ka dak tema nung paramilitary forces yoksema liasü.

Administrative district 64 aliba nung paramilitary Border Guard Bangladesh (BGB) temi district 34 nung tanükba agütsür.

Tesüba anogo asem tsüngta tesem balala nung lendong timtem agütsür tanishir kar aputsü imlar, ta elite anti-crime Rapid Action Battalion (RAB) ajanga ashi.

Central Chandpur kübok Hajiganj sub-district nung Bodhbarnü aser Brehostibarnü Muslim nunger kar aser police tsüngta raratepba mapang nisung pungo asü aser aika yirua lir.

Brehostibarnü Ato Kilonser Sheikh Hasina-i aibelener nem tapet temerenshi agütsütsü nangzüker aser Comilla nung Durga Puja tesem aser Hindu nunger tekülem ki amaker kata nema tatok magütsütsü, ta ashi.

"Comilla tatalokba kanga junga bushisüngdangogo. Shinga nema tatok magütsütsü. Koba tamangba yimsü nungi südir süaka. Parnok bushitsü aser merenshitsü," ta lai Dhaka nung aliba Dhakeshwari National Temple nung sentong ka agidang ashi.

Chandpur den arütsüa aliba aser Dhaka nungi kilometre 100 shi pilar Cumilla nung Durga Puja pavilion ka nung tamangba yimsü mezüngmeshiba atalok, ta tai tonglokja rongrong ya tenzüker, aser iba atema bushisüngdang tenzüikogo.

Block level asayamung asayaogo



Dimapur, Mongputeni/October 17 (TYO): Nagabazar Youth Organization (NYO)-i ayongzuka block level asayamung ka asayaogo. Iba asayamung ya Nehru Yuva Kendra, Kohima kübok parnoki senotsü teyari agüja asayaogo.

Asayamung lapokba sentong nung Nagabazar Panchayat chairmen V. Kobou Solo alakteta jaoker liasü.

Asayamung nung teburtem football, tebur aser tetsür Badminton aser Volleyball asayaa liasü.

Asayamung shibangba sentong nung takokertem nem sempet aser kuli kakat tem G.B. Nagabazar, Khriengulie Rio-i agüja liasü, ta NYO tir Khrieketoulie Kintso-i sangdong ka ajanga metetdaksü.

Afghanistan nungi football asayar 100 shi anir ogo: FIFA

Kabul, Mongputeni/October 17, 2021 (Agencies): Hokolbarnü, FIFA-i ashiba agi, Afghanistan nungi football asayar 100 shi aser parnok kibong anir aotsü asoshi Qatar Sorkar den mapa inyaktepogo.

Qatar indang assistant foreign minister Lolwah Alkhatir-i ashiba agi, Brehostibarnü Kabul nungi tayimtsü nung arurtem rongnung football asayatem aser parnok kibongtem dena lir.

Sangdong ka ajanga FIFA-i ashiba agi, iba telok (football asayatem), kong tetsür asayatem dena lir, parnok lendongbang nung liasü ta asadantetogo. Iba inyakyim nung nungita yariba aser parnok (football asayar aser parnok kibongtem) timtem kecha melii

anir aruba atema Qatar dang pelaba metetdaksür.

"Taküm August nungi tenzüka iba telok (football asayatem) anir aotsü asoshi FIFA nung lennirtem Qatar Sorkar den tesendaktep tajung yur maparen inyaka aruogo aser tarutsü nunga asayar aser parnok kibongtem anir aotsü asoshi onoki maneni inyaktsü," ta kasa sangdong nung shia lir.

Hombarnü, Cycling indang tentet tuluba, UCI-i ashiba agi, Afghanistan nungi refugee 165 anir aotsü asoshi teyari agütsüogo. Item refugee rongnung tetsür cyclist, journalist aser human rights campaigner tem dena lir.

Taoba ita, International Olympic Committee president Thomas Bach-i ashiba agi,

Afghanistan nung "Olympic community" indang züngsem 100 shi humanitarian visa nung linük toktsütsü asoshi iba tenteti (IOC) teyari agütsüogo.

August ita, Australia-i Afghan tsür athlete 50 dak tema aser parnok kibongtem Afghanistan nungi anir ogo. Ano taoba ita (September) Afghanistan indang national female youth soccer squad nungi asayar ishika Portugal nung alitsü asoshi temelaba agütsüogo.

U.S-i aniba foreign forces temi Afghanistan toktsür aoba aser anüolen aliba linüktemi nungitba sorkar laoba sülen, August 15, 2021 nü Taliban-i Afghanistan indang yimtiba Kabul atsüng aser taoba ita Sorkar tasen ka kümetetogo.

Beijing Winter Olympics anemba atema Athens nung nisung 2 apu

Mongputeni/October 17, 2021 (Agencies): Deobarn anepdang Athens kübok Acropolis nung banner ka mesangtsü merangba mapang tetsür ana Greek police-i apu. Taruba Beijing Winter Olympics anema tenati iba mapa inyaka liasü.

Activist arishi küm 18 tain Tibet tsür, kaketshir Tsela Zoksang aser arishi küm 22 Hong Kong activist Joey Siu na ya America senso lir aser tena ya "No Beijing 2022" campaign züngsem lir, ta New York nung amenoker aliba Free Tibet kaketshir lokti tenteti sangdong ka ajanga metetdaksü.

Tena den ano nisung ka iba archeological site yagi taa agütsür ai aser iba sülen Zoksang o Siu na kisütsü atema razüker aliba tesem kati soketa atu aser banner ka mesangtsü meranga liasü.

Security officer ka aritepa tena dangi ao aser banner ya agin. Tetsür ana ya iba tesem nungi mainshi aser Tibet indang wako ka aser "Free Hong Kong Revolution" indang banner tila ka salatsü. Tenatisa "Free Tibet," "Boycott Beijing 2022" aser "No freedom, no Games" amala yimyim ayima liasü. Iba sülen police tem arua longkak aiterem apu.

Tatalokba ajak ya minute 10 shi nung ataloka liasü.

"Alima kintemi aser nüji nisungtem ajaki nokdak Beijing 2022 nung shilem magitsüla; ajita mesera China indang genocidal regime pusemer asütsü," ta Zoksang-i ashi. Kasa mapang nung Siu-i, "Hong Kong, Tibet, East Turkestan aser Southern Mongolia nung meimchir temeden anema inyakba aser genocide dak sendakba nung

mangu ama toktsüba osang ka IOC-i alima dangi yoker."

24buba Winter Games atema Olympic milak ya Ancient Olympia nung Hombarnü tsükdaksü aser Athens kübok Panathenian Stadium nung Mongolbarnü sentong ka agia China nem iba milak amoktsütsü. International Olympic Committee indang Executive Board Athens nung Honibarnü ajurutepogo.

2008 kuma China nung Olympic Games asayatsü lia Athens nung March ita longka aita liasü. Greek aser Tibet nung kari torch relay meinprongtsü merang saka takok mongutet.

Beijing Winter Games ya 2022 küm February 4 nungi 20 tashi asayatsü aser iba sülen March 4 nungi 13 tashi Paralympics asayatsü.

Hockey Women National Championship Jhansi nung asayatsü

New Delhi, Mongputeni/October 17 (Agencies): 11buba Hockey India Senior Women National Championship Uttar Pradesh kübok Jhansi nung October 21 nungi 30 tashi asayatsü. Iba asayamung nung team 28-i shilem agitsü.

Iba asayamung ayongzuka asayaba ajanga domestic asayatem nem parnok sempet sayatsü atema maongka agütsütsü.

Team 28 ya group ti kuma lemsar asayatsü aser group shia nungi takokertem quarterfinals atema qualify asütsü.

Group asayatem anogo troknü asayaba sülen quarterfinals October 27 nü asayatsü aser iba sülen October 29 nü semi aser


October 30 nü final asayatsü lateta lir.

Hockey India-i latettsüba SOP tem dak alaka asayamung nung shilem agitsü aliba asayar, coach aser technical officials temi Jhansi tonga aruba sülen ghonda 48 tsüngda agiba negative COVID RT-PCR test report benoktsü nüngdaker.

Maneni asayar aser ketdangsurtemi parnok indang mobile devices nung Aarogya Setu app inoktsüla. Asayaba maopu nung asayatem dak alaka asayamung nung shilem agirtem ajaki tetsüngda ita inyaksangshitsüla.

Ano asayamung committee-i COVID-19 task force ka tentettsütsü aser parnoki Ministry of Home Affairs aser state sorkari tetuyuba agütsür aliba ajak benoktsü.

India-i SAFF Championship 8benbuba kokogo



Sunil Chhetri

India-i amokbanger asaya ajisüaka goal midaktsütet. Ajisüaka asaya tanabuba shilem tenzükli Chhetri-i mezüngbuba goal idaktsü aser Nepal team ano mesüngjemi alidang mapang tatsüka tsüngda Suresh-i tanabuba goal idakja goal 2-0 agi India tejakdang aküm.

Head coach Igor Stimac lenisüba kübok India team-i tang mezüngbuba asayamung ka koktetogo. Team-i asaya aika mekoktetba atema Stimac aija aliba mapang ka nung tang iba takok ngutetogo.

Kasa mapang nung Jiri Pesek (1993) aser Stephen Constantine (2015) na lenisüba nung iba asayamung akokba sülen tang Stimac ya bendanger coach tem rongnung iba asayamung koktetba tasembuba coach kümogo.

Goal ana idaktsüba sülen minute 52buba nung Manvir Singh-ia goal idaktsütsü atema maongka angu saka pai metsüba ball nokdanga liasü aser minute 79buba nunga Udanta Singh-i goal idaktsü aser tang tasayadak aliba asayatem rongnung international football nung goal timtiba idaktsürtem rongnung tanabuba jenjang nung lir.

Iba sülen Sahal Abdul Chhetri-i mezüngbuba goal idaktsüba sülen Suresh Singh aser Saha nati goal kaka idakja India team-i iba asayamung akok, koba kanga danga nüngdaka liasü, kechiyong team mapang talangka junga masayateti aruogo.

Asaya mezüngbuba shilem Iba asayamung 13 ben asayaba nung India-i final 12 ben tashi tonga asayaogo aser iba ajanga India team-i iba asayamung amokbanger asayaba sayur.

Mongputeni/October 17, 2021 (Agencies): Honibarnü 8buba SAFF Championship final nung India-i goal 3-0 agi Nepal madak takok nguogo. Iba asaya nung Sunil Chhetri-i pa indang career nung goal 80buba idakja Lionel Messi den kasa kümogo. Asaya nung Chhetri (49th minute), Suresh Singh (50th) aser Sahal Abdul Samad (90th) nungeri goal kaka idakja India-i maneni iba asayamung amokbanger asayadar.

Final nung goal idaktsüba sülen arishi küm 37 tain Chhetri-i nungtugu asayar Messi den goal kasa idaktsüogo aser tang tasayadak aliba asayatem rongnung international football nung goal timtiba idaktsürtem rongnung tanabuba jenjang nung lir.

Chhetri-i mezüngbuba goal idaktsüba sülen Suresh Singh aser Saha nati goal kaka idakja India team-i iba asayamung akok, koba kanga danga nüngdaka liasü, kechiyong team mapang talangka junga masayateti aruogo.

Asaya mezüngbuba shilem

BILEMDANGANG

"Tangar anema bilemba agi nü mulungsentsü temenendaksü."